

**11 OCTOMBRIE
SLUJBA
SF.14 CUVIOSI
LEON,MACARIE,MOISE,ILARION,
ANTONIE,AMBROZIE,ANATOLIE 1,
ISAACHIE 1,IOSIF,VARSANUFIE,
ANATOLIE 2,NECTARIE,NICON
SI ISAACHIE 2
DE LA OPTINA**

Служба
преподобным отцем и старцем
Оптинским

НА ВЕЧЕРНЕ

На Господи воззвах: *стихиры святых на 8, глас 1:*

Днесь собора преподобного прославление / и святого воинства Российскаго величание. / Земля плод нетления приносит, / небо десницы благодати простирает; / людие же зряще сие сретение ужасаются, / недоумевают и Бога славят: / Великий в советех, Господи, слава Тебе.

Ныне величие славы Оптинской; / ныне торжество и радость совершенная: / старцы Божии чинно от небес исходят / и хвалу от сынов своих принимают. / Велie братство Богом созиждается, / яко несть Господь мертвых, но живых, / и Ему, Владыце и Царю нашему, / едиными устнами, братие, возопиим: / Жизнодавче Христе Боже наш, слава Тебе.

Днесь радость и печаль воинствуют, / радость же победу торжествует, / земля безгласно разверзается, небо милостивно отворяется; / лики небеснии сиянием восходят, / людие духом возвышаются; / вселенная воскресение предызображает и велиим гласом вопиет: / Благословен Грядый во имя Господне.

Ныне сретение велие празднуем, / залог воскресения грядущего торжествуем. / Ныне слезы в мире с радостью, / покаяние в объятиях с милостию; / днесь грех ко стопам праведности припадает, / ложь истину о милосердии молит; / дети главы смиренно преклоняют, / отцы длани милостивно простирают. / Торжествуй, вера православная, / в тебе единой всем примирение.

Приидите, братие, ибо время приспе. / Созиждем гробы пророческия, / украсим раки праведных и возглаголем: / О, отцы святии! / аще быхом во дни ваша, / не быхом убо общницы в распятии вашем. / Се бо и мы смерти ужасаемся, / но о Господе тако глаголати дерзаем: / Боже Отец наших, слава Тебе. Велия благочестия тайна: / земля отдает небу подлежащее, / сыны приемлют отцов нетленными, / святость воочию зрится и руками осязается, / утвердятся православнии, / невернии покаются, / пришед бо свидетельство последнее, / да веруют вси в живот вечный.

Слава, глас 4:

Возвестите славу и утешитесь, / не людьми, но Богом дарованную / подвизавшимся в пустыни Оптинской
отцам преподобным. / Сии благо тайно сотворше, / воздаяние явно прияли есте, / лишения и труды на земле
понесоша, / на небесех блаженства достигли есте. / О, слава наша истинная! / уничиженных хвала последняя,
/ гонимых едино пристанище, / поруганных честь неоскверненная. / Соборне Христа Бога молитесь, / да
приложит на милость суд об отечестве нашем.

И ныне: Догматик

На литии стихиры, глас 8:

Восста от мертвых земля Оптинская, / яко иногда Лазарь Четверодневный: / прииде Господь по мольбам
отцев преподобных / на место погребения ея / и рече: Гряди вон! / Восста пустыня чудесно / и изшед на
служение пеленами обвита, / ликом воскресшим проповедь совершая, / неверных обращая, ожесточенных
умирая, / всех возставляя вопити: Господи, слава Тебе.

Видя Господь Матерь Свою, / яко вдовицу плачущу об обители умершей, / милосердова о ней и рече: Не
плачи. / Приступил же и коснулся врат монастырских, / и восста пустынь и начат глаголати, / и даде ея
Матери Своей в попечение. / Страх же объят вся, и славяху Бога, глаголюще: / яко посети Бог людей своих
ради печали Матерней.

Се собор преподобных пришед, / паде при ногу Иисусову, / моляще же Его много о пустыни Оптинской,
глаголя: / Яко дщи наша ныне умре, / да пришед возложиши на ню руце, и оживет. / Не умре бо земле, но
спит, - глаголет пришедый Господь. / И изгнан бысть из нея народ молвящ, / восста обитель по глаголу
Божию, / и возвратися дух ея, / и изыде весть сия по всей земли Российской.

Ины стихиры на литии, глас 7:

Се знамение явися в Церкви Русской: / обитель в солнце облеченная, / чада же ея светло просияша / на
падение и восстание многих. / Ей же самой душу оружие пройде, / да откроются от многих сердец
помышления, / имже Бог дарует время на покаяние / и велию и богатую милость.

От пустыни собор преподобных / к сонму святых русских приложися, / силам небесным радостьдаруя, / ликам
иноческим празднество устроая. / Темже возрасте полче божественный, / земная надежда утвердися, / яко
Христос прославися во отечестве нашем.

Ныне славу ликующе воспеваем, / новыя иконы лобызаем умиленно, / лампы елеем наполняем, / свечи и
паникадила радостно зажигаем; / хоругви износим и шествие торжественное совершаем; / се ныне сретение
дети уготовляют отцем преподобным и слезно их молят: / приидите и посетите недостойных чад своих.

О, созвездие небосвода иноческого! / О, дивная стая орлиная! / Многосветлое паникадило храма Богородицы,
/ истинная гроздь винограда Христова, / - тако речем вам, отцы преподобнии, / тако именуем и славим собор
святых Оптиных.

Царь Небесный / слуг Своих в чертог огнеблещущий вводит, / во одежды белыя облачает, / имена новая, нам
не ведомая, нарицает; / на престол Свой их посаждает / и венцы жизни на главы их честныя возлагает. /
Слава сия верным и победившим / и дела Его до конца соблюдающим. / О, отцы святии, други Христовы! /
помяните у престола Владычня / память вашу посильно совершающих.

Людие вспять возвратитесь, / о временах же утекших нам возвестите; / земли утренния ороситесь, слезы
впитанные нам покажите; / древа восклонитесь, труды с печальми сокрытыми являя; / камни восстаните,
красоту древнюю зрети сподобляя. / Вся бо узрим и ужаснемся, / вся бо увидим и устыдимся. / Темже молим
вас, отцы святии, / не отрините сынов недостойных, / заступлением вашим ограждающихся.

Слава, и ныне: глас 4:

Предста Царица Сыну Своему, / егда воссташе Господь судити миру; / руце пречистыя в мольбе простерши за
ны, / яко голубица крыле свои за птенцы своя, / и ничтоже глаголаше, токмо слезы смиренно имуща; / и о,

чудо, ангелов устрашающее, / возмутися духом вселенной Господь, / Бог Всемогуший прослезися, / силы небесныя вспять возвратишася, / суд о земли на милость приложися, / еще мир миру даровася, / яко да возвеличим Богородицу Пречудную.

На стиховне стихиры, глас 2

Подобен: Дому Евфрафов:

Старцы святии, / пророки земли Российской, / Богом Словом Вседержавным / на служение воздвигнутыя, / да возвестится истина последняя (восторжествует народ православный).

Стих: Господи, Господь наш, / яко чудно имя Твое по всей земли.

Пустынь блаженная, / из тебе бысть Христу Богу / глас вопиющий, / имже старцы умоляше / за землю и веру православную.

Стих: Святым, иже суть на земли Его, / удиви Господь вся хотения Своя в них.

Свидетелие истины / отцы преподобнии / во тьме нам спящим, / и тьма не объят вы, / светом веры мир облистующих.

Слава, глас и подобен тойже

Новая скиния Адамова / при дубраве старческой, / обитель Введенская, / восстани в духе Отческом / в сретение Христу Богу нашему.

И ныне: глас и подобен тойже

Ангельския силы, / Богородице Марие, / с лики человеческими / удивляшася соборне / Матеродевству Твоему Божественному.

Ин Богородичен, глас 8

Подобен: О, преславного чудесе:

Богородице пречудная! / Пречудный наш Спасе! / Ликовствует сердце, Вас именую, / очи слезы источают, / зря на лики Ваша. / О, Владыко со Владычицею! / не оставите люди Своя, / иже от века не имамы иныя четы (Царския) / сердцами нашими повелевающая.

Тропарь преподобным старцам Оптинским, глас 6:

Православныя веры светильницы, монашества непоколебимии столпи, земли Российской утешителие, преподобнии старцы оптинстии, любовь Христову стяжавшии и души своя за чада полагавшии, молитесь ко Господу, да утвердит земное отечество ваше в православии и благочестии и спасет души наша.

Ин тропарь, глас 4:

Введения преславного обитель, / Оптиная пустынь достоблаженная, / присно уповающая на милость Богоматери, / наполняема рекою, текущею в живот вечный, / возрадивше чудное древостарчества, / уподобилася еси граду, сошедшему с небес, / идеже Бог обитает с человеки, / отирая с очей их всякую слезу, / темже возликуем, братие, / Христа Царя и Бога нашего воспоим / и Владычицу Мира Пречистую Деву восславим, / яко дарова нам пристанище во спасение / и наставников отцев преподобных.

НА УТРЕНИ

На Бог Господь: *тропарь святых дважды.*

Слава, и ныне; Богородичен.

Седаьны зри в Общей Минее.

По 50 псалме стихира, глас 4:

Не умолчим ныне истины православия, / Христом Богом до века утвержденных, / собором святых старцев (наших) воссиявшей / и доселе во избранных дивно сохраняейся. / Непоколебимо основание ея, / до облак ея величие, / несть бо под небом веры иной, / о ней же подобает спастися нам.

КАНОН
преподобным отцем Оптинским,
глас 2

Песнь 1

Ирмос: Грядите, людие, поим песнь Христу Богу, раздельшему море, и наставльшему люди, яже изведе из работы египетския, яко прославися.

Како восхвалим вас, преподобнии отцы Оптины Пустыни, добре подвиги совершите, веру спасительную соблюдоште, и весь мир своим богоугодным житием удивисте.

Вземше на рамена своя благое иго Христово, подвизалися есте, отцы преблаженнии, шествовати в царство вечныя жизни тесным путем и достигли есте славы небеснаго предстояния пред Престолом Бога Вышняго.

Слава: Кто испыта труды ваша и болезни, отцы святии, кто виде слезы и поты вашего многоскорбнаго жития, имиже соделали есте души ваша сосуды многия благодати Божия?

И ныне: Мати Бога Истиннаго, приими мольбы рабов Твоих, ищущих Твоего заступления. Ты бо еси пристанище необуреваемое православных христиан.

Песнь 3

Ирмос: Утверди нас в Тебе, Господи, древом умерщвей грех, и страх Твой всади в сердца нас, поющих Тя.

Славу мира сего ни по чтоже вменив, житие чистое избрал еси, преподобне отче Льве, восприяв великую схиму, яко огнепальный щит непрестанныя молитвы противу козней демонских, и царство вечное наследовал еси, Христу подражая всем житием твоим.

Богу содействующу, истинное жителство духовное во обители Оптине насадил еси, якоже древнии учителие монашескаго делания, блаженне отче Льве, мо лися о спасении душ наших.

В Бозе ревностно исполненный, духовное окормление подвигом старчества людем явил еси, и тем просиял еси яко первоначальник сего спасительнаго делания, преподобне отче наш Льве.

Слава: Научи нас, достоблаженне отче Льве, чтущих святую память твою, житию во Христе, имже сам угодил еси Богу, да и нас, неключимых рабов Своих, всещедрый Господь просветит светом разума и спасет души наша.

И ныне: Бога воплощаема из Тебе зряще, Дево, ужасавшася страхом и трепетом горние силы, и яко сущую Богородицу тя непрестанно величают.

Ин кондак, глас 1

Крепкаго корене монашескаго жителства / отрасли благочестия явились есте, / преподобнии отцы Оптины пустыни, / и яко многоплодный вертоград возрасли есте, / питающе дарами своя святости / алчущия и жаждущия правды Божия, / осеняяще Отечество наше православное / молитвами и предстательством / пред Престолом Бога Вышняго. / Темже прилежно взываем вам сице: / не оставите нас в скорбех и болезнях, / чающих от вас помощи / и избавления от всяких бед и напастей.

Седален, глас 4:

Житейское море воздержанием без труда преплывше, ко пристанищу мысленному безстрастия пристали есте, преподобнии отцы и богумудрии.

Слава, и ныне, Богородичен:

Девство и рождество выше естества и слова в Тебе Богородице стекостеся, яко Бога Воплотившагося родила еси, Спаса душ наших.

Песнь 4

Ирмос: Услышав, Господи, славное Твое смотрение, и прославих, Человеколюбче, непостижимую Твою силу.

Житие твое, преподобне отче Амвросие, яко солнце в сердцах верных возсия, зарю чудес являя, сего ради не забуди и нас, недостойных чад твоих, чтущих блаженную память твою, и любовь твою просвети души наша, омраченныя грехов множеством.

Вся земля российская позна имя твое, святой отче Амвросие, осияваемая благодатию чудес твоих, и ныне притекающе к раце цельбоносных мощей твоих, просим тя, да молитвами твоими Господь спасет души наша.

Прославляюще твоя подвиги, преблаженне отче Амвросие, в сонме великих старцев Оптиных, молим тя: не остави нас, немощных и убогих, в скорбех и болезнях наших, но помози и избави нас от бед и напастей губительных.

Слава: Яко первая звезда, возсия на небеси от Оптины Пустыни твое преславное имя, преподобне отче Амвросие, возвещающая торжество собора всех отцев, zde просиявших.

И ныне: Един от Святыя Троицы воплотися от Тебе, Пречистая, да спасет весь род человеческий от работы вражия и вечнаго осуждения.

Песнь 5

Ирмос: Света подателю, и веков Творче Господи, во свете Твоих повелений настави нас: разве бо Тебе иного бога не знаем.

Всего себе покорил еси Христу Жизнодавцу, преподобне отче Моисее, исполняя Божественныя заповеди Святаго Евангелия, стяжал еси Духа Святаго в сердце своем, всеусердно трудяся в пустыни, яко верный раб Христов.

Благого единоревнителя обрел еси, отче Моисее, взирая на подвиги брата своего по плоти боголюбиваго Антония, иже вкупе с тобою пришедый спасатися в обитель Оптину.

Послушания добрый рачитель был еси, преподобне отче Антоние, вся претерпел еси скорби, болезни и лютаго искушения от лукавых духов и по кончине своей земныя жизни преселился еси в чертог славы вечныя.

Слава: Добрая двоица явилася еси преподобных отцев и братий по плоти Моисее и Антоние, своими многими подвиги и труды украсивши духовный вертоград обители Оптины, имиже прославися Бог Господь, дивный во святых Своих.

И ныне: Все наше упование на Тя возложихом, Дево Марие, призри на ны, люди согрешившия, с верою чающия от Тебе заступления и спасения.

Песнь 6

Ирмос: В бездне греховней валяясь, неизледную милосердия Твоего призываю бездну: от тли, Боже, мя возведи.

Яко светильник Божия благодати явился еси, преподобие отче Макарие, далече простирая лучи своего равноангельнаго жития, имиже просвещени быша сидящие во тьме и сени смертней.

Испытуя творения богопросвещенных отцев Древня Церкви, порадел еси зело, отче Макарие, о умножении их духоносных писаний, да всяк жаждый грядет и да пьет воду живу во спасение души своей.

Многотрудным и скорбным путем шед в земном житии своем, преподобне отче Анатолие, быв достохвальный ученик богоносных старцев Макария и Амвросия, прииде к ним от калужския земли и с радостию вселися в сей обители во спасение души своей.

Слава: Сотайник был еси, преподобне отче Иосифе, святаго старца Амвросия и восприял еси от него подвиг духовнаго окормления чад его, наипаче же обители Шамординския, не остави любовь твою и нас, чтущих святую память твою.

И ныне: Владычице Богородице, отверзи нам двери милосердия Твоего, Ты бо еси спасение рода христианского.

Кондак, глас 6:

Воистину дивен Бог во святых Своих, Пустынь Оптину якоже вертоград старчества явивый, идеже богопросвещеннии отцы, тайная сердца человеческого ведуще, народа Божия печальницы доблии явишася: сии бо на путь покаяния грехом отягощенные наставиша, в вере колеблющихся светом Христова учения просветиша и Божией премудрости научиша, страждущим и немощным спострадаша и исцеления дароваша. Ныне же, во славе Божией пребывающе молятся непрестанно о душах наших.

Песнь 7

Ирмос: Образу златому на поле Деире служиму, трие Твои отроцы небрегоша безбожного веления, посреде же огня ввержени, орошаеми пояху: благословен Бог отец наших.

Тленную красоту мира сего и славу земную презрев, преподобие отче Варсонофие, стопы своя направил еси во обитель Оптину и тамо достигл еси умною молитвою и благочестием духовного совершенства, поя Господу: Боже, благословен еси.

Молися о нас, преподобне отче Варсонофие, да спасет Господь милосердием Своим души наша почитающих всех отцев, в Оптине подвизавшихся, да зовем вкупе с ними: Боже, благословен еси.

Узрел еси ты, преподобне отче Анатолие, исполнение пророческих глаголов старца Варсонофия о грядущих бедах России и сам претерпел еси скорби и бурю искушений, с упованием неся крест свой, зовя: Боже, благословен еси.

Слава: Изрядный ученик великаго учителя монашества преподобнаго Амвросия был еси, блаженне отче Нектарие, многосветлыми добродетелями просияв, в последок жития своего претерпел еси изгнание и в Бозе скончал еси земное странствование, поя: Боже благословен еси.

И ныне: Простри руке Своя, Преблагословенная Дево, к Сыну Твоему, Христу Богу нашему, молящи усердно, да помилует нас, грешных, по велицей Своей милости.

Песнь 8

Ирмос: В купине Моисею Девы чудо, на Синайстей горе, прообразившаго иногда, пойте, благословите и превозносите во вся веки.

Венцы нетленные прияли есте, богоноснии отцы Иларионе, Исаакие и прочия старцы Оптиности, исполнившие в житии своем закон Христов, и наследовали есте горнии обители Отца нашего Небеснаго, зовуще: благословите, вся дела Господня, Господа.

В смирении претерпели есте вся злострадания, отцы святии Никоне и Исаакие, крест взявше на рамо, яко исповедницы и мученицы Христови, добropобедно житие свое скончали есте, и тако внидоште в радость Господа своего, воспевая: благословите, вся дела Господня, Господа.

Вера ваша привеле вас ко Христу, преподобнии отцы, надеждою на Его всеблагую волю укрепляеми: добрыя плоды любви принесли есте Богу Небесному, зовуще: благословите, вся дела Господня, Господа.

Слава: Прославляющего днесь собор Оптинских старцев, небесным облаком сих свидетелей правды Божия осеняеми, воспоим, вернии людие, песнь Богу, взывающе: благословите, вся дела Господня, Господа.

И ныне: Неусыпаемую в молитвах Заступницу обрете Тя, Непорочная Дево, человеческий род. Темже радующеся, поем: благословите, вся дела Господня, Господа.

Песнь 9

Ирмос: От Бога Бога Слова, неизреченною мудростию, пришедшаго обновити Адама, ядию в тление падшаго люте, от Святыя Девы неизреченно воплотившагося нас ради, верни единомудренно песньми величаем.

Се отверзесе вам, отцы святии, Царство Небесное, скончавшим доброе житие на земли, и ныне зрите Славу Божию, якоже ангельское воинство, непрестанно славословяще Триипостасное Божество.

Вознесите, преподобнии отцы, молитвы ваша горе, яко кадило благоуханное, о всех чтущих вашу святую память, споспешествующе нам в скорбных обстояниях благоугодити Богу и сподобитися наследовати жизнь вечную.

Множество монахов ныне во святей Оптине обители торжествует, величая собор Богоносных старцев, Богом дивно прославленных, принесем и мы хвалу Христу Спасителю нашему, прославляющему прославльших Его.

Слава: Воспоим, братие, песнь нову Господу Иисусу, прославльшему днесь велий сонм старцев Оптинских, и с верою поклонимся ему, да не отринет от Лица Своего и нас грешных рабов Своих, чающих себе спасения их молитвами.

И ныне: Родила еси безлетнаго Сына, Пречистая, плоть нашу приимшаго, Кровию Своею на Кресте омывшаго от грехов падшаго Адама, умоли убо Спаса нашего избавити нас от вечныя смерти.

Светилен:

Процвели есте, яко финикс, давидски, и обители явистесь Духа Пресвятаго: и славнии вселенней покажешся. О нас непрестанно молитесь, почитающих верою пречестную память вашу, преподобнии.

Слава, и ныне:

Тя песнями немолчными ублажаем Дево. Яко от Троицы Единого родила еси, Богородице, и носиши на Божественную руку Пребогатое Слово, непременно и неизменно.

На хвалитех стихиры на 4, глас 8:

Радуйся, земле Оптинская, / Заиорданье Российское! / Ангелом место возлюбленное, / человеком страна светлая. / Дивны красоты твоя, / велия слава твоя, / чудны обетования твоя! / Красуйся, благословенная, и ликуй, / яко Господь Бог с тобою.

Восклонитесь, вернии, / воздвигните главы ваша, / зане облак свидетелей Христовых облек землю нашу. / О, высоте и слава Российская, / покров веры нетленный. / Яко радуга подвигов ваших сияние, / яко дождь животворный милосердие ваше велие; / пророчества ваша яко гром небесный, / силы ваша яко молнии огненные. / Древле земное в небесное претворивше, / ныне светом преображенным сияете нам, / зряще Солнце Правды Христа Бога нашего.

Радуйся, Кана Галилейская, / начало чудесем положившая. / Радуйся, пустынь Оптинская, наследие чудотворства приявшая. / Яко Господь избирает тя и ублажает, / купно Мати Его и ученики Его, / темже примите людие радость совершенную, / утешение познайте, истиной подаваемое, / и источник ликования преевечнаго.

Возрадуйтесь, други и недруги, / ныне всем ликование подобает, / надлежит всем пение сладкогласное: / ничтоже может любви Божией противостати, / вся радостию побеждаются, / вся веселием преклоняются. / Темже Бог наш Всесилен и Чуден, / даруя святым Своим честь и славу / и недостойным Его Свою велию милость.

Слава, глас 6:

Лики ваша лучезарнии, о, отцы святии, / церквам Российским свет невечерний, / мощи ваша - благоухание жизни вечной, / писания ваша - хлеб и питье истинные. / Вас, отцы преподобнии, радуясь именуем, / вас и печалуясь призываем, / темже Церковь небесная от клира земнаго пополняется.

И ныне, глас тойже:

Имуще чреду священную, / на земле Русской по долгу пребываеши, Богородице всепетая, / но по любви Матерней слезы проливаеши / и молиши о всех непрестанно. / Темже не остави, Владычице, люди Твоя / и милостию обогати от щедрот Твоих.